

REGOLAMENT DES CONCESSIONS LEADIS AI CIMITIERIS

TEST COORDINÂT

Variations dal Regolament fatis buinis cun at dal Consei Comunâl numar 47 dai 29 di Jugn dal 1998. Cjatât legitim dal CO.RE.CO (Comitât Regjonâl di Control) inte sedude dai 7 di Setembar dal 1998 numar di protocol 35536 Comitât Regjonâl di Control 5028.

Gambiât cun deliberazion dal consei n. 24 dai 13 di Mai dal 2003 e esecutîf dai 14 di Mai dal 2003.

Gambiât cun deliberazion dal consei n. 57 dai 25 di Novembar dal 2003 e esecutîf dai 25 di Novembar dal 2003.

Art. I

I cimitieris dal Comun a son:

- cimitieri di Puçui dal Friûl – cjâf lûc;
- cimitieri di Terençan;
- cimitieri di Çuian;
- cimitieri di Cargnà;
- cimitieri di Samardencje;
- cimitieri di Cjarpenêt.

Art. I bis

Tai cimitieris dal Comun a vegnin metûts, cuant che no ai divierse disposizion, i rescj:

- a) de int muarte tal Comun ;
- b) de int che e veve la sô residence tal Comun, ancje par pôc timp ;
- c) de int che e à dirit a vê une sepulture private ;
- d) de personis nassudis muartis o di chês che a son il risultât di une nassite metude tal art. 7 dal D.P.R 285 dai 10 di setembar dal 1990 che al dîs: “Approvazion dal Regolament di Polizie mortuarie”;
- e) la cinise de int che e domande di dâ i soi rescj a la famee;
- f) tal câs proviodût parsore lant daûr a lis modalitâts e prescrizioni proviodudis da la normative cumò in vore e di chel che e ven scrit chi sote:
 - Presentazion di une istance fate dal parint di chel che al è muart decretât in vite dal “de cuius” pal affidament da lis cinisis e in plui al à di jessi presentade une cjarte indulà che il muart al vedi lassât scrit la sô volontât o câs diviers une copie conforme. Inte istance a àn di jessi metûts:
 1. i dâts anagrafics e la residence di chel che al fâs la domande (secont la letare e al scugne jessi dome un familiâr) dal come 1 dal art.3 da la Leç 130/01;
 2. la declarazion di responsabilitât par impegnâsi a tignî a ments lis cinisis e la autorizazion a acetâ tant che legitim i pussibii controis da la Aministrazion Comunâl;
 3. il lûc indulà che e vignarà metude la urne e il non di chel che al firmarà il verbâl al moment da la consegne da la urne sierade;
 4. la cognossince des normis relativis ai reâts che a nassin da la dispersion des cinisis cence vê vût il permès e la cognossince des normis dal codiç penâl in materie di profanazion di urnis sacradis;
 5. la pussibilitât di meti la urne tal cimitieri se un familiâr no vûl plui tignîle;
 6. la mancjance di impediments stabilîts da la autoritât judiziarie o da la publiche sigurece par la consegne da la urne;

7. il dovê di informâ la Aministrazion Comunâl de variazion di residence dentri dai dîs (=10) dîs dut al plu.

Art. II

Control, pulizie e discipline

Il setôr Igiene Pubbliche da la A.S.S al ten di voli e al controle cun atenzion il funzionament dai cimiteris e tal stes timp al propon al Sindic proviodiments par garantî il regolâr servizi.

Il Sindic, cul jutori dal Ufici Tecnic, al à di vuardiâ la costruzion, la buine tignude e la conservazion da lis oparis fatis tai cimiteris dal Comun e dai citadins privâts.

Art. III

I fruts che a no son acompagnâts di int adulte, lis personis che a son vistudis in maniere indecorose e chês che a son cjochis no puedin jentrâ tai Cimiteris. In chescj lûcs al è ancje improibît di puartâ dentri bicicletis e di fâ jentrâ cjans o altris animâi.

Ducj chei che no àn un mût di fâ seri, chei che a vuastin i elements dal Cimiteri, come lis plantis, chei che a robin rosis, ogjets o argagns e chei che a dan fastidi a la int che e je dentri, a saran mandâts fûr subite o diferîts a la Autoritât competente.

Al è improibît di cjoli o di meti lapidis e altris testimoneancis in ricuart dai muarts cence il permès da la Aministrazion Comunâl.

Art. IV

Al è improibît di tacâ sù avîs, cuadris o altris comunicâts e al è improibît ancje di distribuî, dâ o vendi stampâts o altris ogjets cence un permès speciâl da la Aministrazion Comunâl.

Lis rosis, coltivadis o metudis su lis tombis, che a vegnin infûr dal lôr spazi, chês che a son parsore un metri di altece, chês che a impedissin il control dal Cimiteri o chês che a son secjis, a vegnin butadis vie da lis personis incargadis dal Comun.

Lis coronis di rosis e dutis lis plantis che e jerin parsore lis tombis come ornament a vignaran puartadis fûr da lis personis incargadis dal Comun.

Nissun lavôr al pues sei fat dentri tai Cimiteris cence il permès da la Autoritât Comunâl.

Art. V

Introduzion di materiâl

In linie gjenerâl si pues puartâ tai Cimiteris dome i materiâi che a son za finîts. Dentri tal Cimiteri a puedin sei fats dome i lavôrs di finidure o chei che a coventin pardabon come la muradure.

Art. VI

Improibizion di fâ lavôrs

Dilunc i dîs di fieste, ven a stâi une zornade di fieste di caratar public, al è improibît tacâ cualsisei lavôr. Tal stes timp al è improibît ancje scomençâ un lavôr cinc dîs prime e vot dîs daspò da la zornade dai Muarts, gjavânt fûr i lavôrs di pulizie ordinarie.

Dai 30 di Otubar ai 4 di Novembar al è improibît meti jù lapidis, marmui e cualsei sgherlif.

Art. VII

Normis gjeneralis a rivuart di concessions e di costruzion di anconis funeraris, monuments e lapidis

Dutis lis domandis di **concession cimiteriâl** a àn di jessi presentadis in cjarte legâl a la Aministrazion Comunâl da lis personis interessadis o di chei che a àn dirit.

Par chel che rivuarde lis concessions di novante, cincuante e trente agns, daspò da la deliberazion da la Zonte Comunâl, si à di fâ un regolâr at restant che lis spesis a son a caric di chel che a fâs domande.

Par lis concessions decenalets, lis colomberis provisoriis e lis soreposizions di rescj in colomberis o in puescj risiervâts, invezit, al baste dome un provediment aministratîf (deliberazion).

Art. VIII

I projets par la costruzion di anconutis, monuments, lapidis o altris segns funeraris a àn di jessi presentâts a la Aministrazion Comunâl e rispuindi a lis prescrizions fissadis dal regolament igienic edilizi in vore.

Lis domandis che rivuardin lis iscrizions o lis epigrafis, redatis in competente cjarte legâl, a àn di vê il test aprovât da la Zonte Municipâl, daspò di vê sintût la Comission igieniche edilizie.

Tal câs di infrazions, si ven punîts cu lis sanzions proviodudis da chest regolament e da lis altris dispozizions legjislativis e di regolament in vore in suaze di edilizie.

Lis lapidis da lis tombis a àn di jessi altis, dut al plui, 130 centimetris ; invezit la lapide dal tombâl no pues jessi plui alte di 30 centimetris. Chestis misuris a vegnin cjapadis dal nivel de tiere dal Cimiteri indulà che e vignarà fate la sepulture.

Art. IX

Il concessionari, daspò di vê vût il nuie cuintri da la Aministrazion Comunâl, al pues fâ lis oparis di bielece o monumentâls, meti rosis, lapidis, pedestri e simbui, ma ancje ringhieris o cuardis di fier dentri dai confins dal so spazi.

Art. X

Il concessionari al è obligât a stâ daûr da la manutenzion da lis oparis che al à fat. Se chest dovê al ven lassât di bande, il Sindic al pues mandâ une difide al concessionari segnant cuâl che al è il dì ultin par finî i lavôrs.

La difide e vignarà notificade al concessionari, se al à la residence tal Comun; in mancjance al baste picjâ la difide par cuindis dîs intal quadri pretori e inte jentrade dal Cimiteri. A la scjadence dai tiermins, cun deliberazion de zonte si pues ordenâ, par mantignî in bon stât il Cimiteri, di gjavâ vie i materiâi e lis oparis e daspò declarâ che la concession e je aromai finide.

Art. XI

Cjoli indaûr lis lapidis

Dutis lis lastris di marmul e chês fatis di altris materiâi che a vegnin metudis parsore lis singulis tombis e no vegnin ritiradis da lis fameis dentri dai trê mêis da la rotazion decenâl o da la scjadence da la concession a timp determinât, a son consideradis bandonadis e cussì a restin a disposizion dal Comun. A chest pont, il Comun al pues ordenâ il sdrumament da lis lastris in ogjet o, in câs, doprâlis par rindi plui biel o dome par miorâ l'aspiet dal Cimitieri, cence che i parons a puedin mandâ un reclam o pretindi une indenizazion.

Art. XII

Rimozion provisorie dai cuarps de int muarte

Se la Aministrazion Comunâl e dîs che si scugne fâ cualsisei lavôr tal Cimitieri, al è pussibil che a vegnin gjavâts fûr, in maniere provisorie e par il timp di durade dai lavôrs, i muarts. In chest câs, la Aministrazion Comunâl e à di mandâ une letare scrite indulà visâ i parincj, o chei che a àn dirit, a rivuart da la decision cjapade.

Tal câs che no si rivin a cjatâ chei che a àn dirit di savê lis gnovis, si scugne picjâ un avîs intal Cuadri Pretori dal Cimitieri, indulà che a vignaran fats i lavôrs, e lassâlu fûr par cuindis dîs.

Art. XIII

Gjavâ fûr i muarts des tombis e des lapidis

Par lis dôs operazions, ven a stâi, gjavâ fûr i cadavars da lis tombis o da lis colomberis, i sogjets interessâts a scugnin fâ domande al Comun e paiâ la tasse dant un voli a la tabele cun segnâts i presits.

Art. XIV

Concessions in suis di anconutis funeraris, colomberis e nicjis pai vues

La assegnazion di chestis oparis e ven fate dal Uffici destinât a lis concessions in suaze di cimitieris e lant daûr a lis normis stabilidis intai articui parsore 7, 8, 9 e 10 di chest Regolament.

Art. XV

Lis concessions che a puedin jessi fatis, gjavant il câs che a sedin, a son:

- a) aree destinade a la costruzion di anconutis funeraris. Chestis concessions a durin 99 agns.
- b) Colomberis che a àn chestis misuris : lungjece 2,20 metris – largjece 0,86 metris – altece 0,28 metris. Chestis concessions a durin cincuant agns.
- c) Nicjis indulà meti i vues e cun chestis misuris : lungjece 0,56 metris – largjece 0,38 metris – altece 0,28 metris. Chestis concessions a durin trente agns.

Se si vûl meti i vues di une persone intune colombero indulà che e je bielzà il cuarp di un muart il presit imponût al è une volte e mieze di chel fissât par un cadavar.

Art. XVI

Il presit da lis concessions di colomberis o di nicjis al cjape dentri il cost de muradure e la lastre di marmul par sierâ la buse. I concessionaris a puedin, a lôr spesis, fâ incidi tal crep il non dal muart e une epigrafe che e à di jessi fate buine dal Comun, sedi par la forme leterarie sedi par la grafie, come stabilît intal articul 8 di chest regolament.

In linie gjenerâl nol è permetût gambiâ la lastre dade dal Comun par sierâ la colombero o la nicje. Lis colomberis, ancje chês provisoriiis, a vegnin dadis in ordin progressîf, lant daûr a la numerazion incidude su la lastre e regjistrate tal plan che al è là dal Ufici Sanitari.

Art. XVII

L'Ufici da lis **concessions cimiterials** dal Comun al met in zornade un regjistri indulà marcâ:

- a) Il numar e la categorie di dutis lis colomberis o lis nicjis;
- b) Il non e la direzion dal concessionari;
- c) Il non e la zornade cuant che al è muart il sogjet;
- d) La date e il numar dal boletin di paiament e in plui la quantitât di bêçs paiade;
- e) I dâts di identificazion dal at di concession includude ancje la scjadence de stesse.

Art. XVIII

I rescj di un cadavar che al ven gjavât fûr, a puedin jessi metûts intune colombero bielzà vude in concession e indulà che al è stât metût un parint. Par fâ chest però bisugne fâ un paiament (il presit si trasmet in zontât) e tignî a ments la misure da la bare o da la urne par viodi se chestis a permetin la jentrade dai vues.

Il vâs par meti la cinise di un muart al à di jessi comprât di chel che al domande la sepulture. Ancje dutis lis spesis par tirâ adun i rescj, par rimovi o tornâ a meti la lastre da la colombero,... a son a caric di chel che al domande la sepulture.

Art. XIX

Al è improibît cualsisei sub-concession o concession jenfri tierçs.

Se, par câs, une nicje o une colombero, bielzà dade in concession, e reste libare parcè che il cuarp o i rescj di un muart a son stâts spostâts di une altre bande, alore la concession e decjât. Se la concession e decjât dentri dai prins disevot agns, il Comun al è obligât a tornâ indaûr, a la int che 'nd à dirit, la tasse paiade par la concession: gjavant trê vincjesims pal prin an e un vincjesim par ogni an che al ven daspò.

Se daspò da la deçadence de concession al covente un at speciâl, lis spesis di chest a son a caric dal Comun.

Art. XX

Scambi di colomberis e nicjis in consequence di tirâ dongje un parint

Compatibilmentri cu la disponibilitât di un puest e la revoche da la concession fate prime, al è permetût tirâ dongje i rescj di un parint metût in une aree divierse dal Cimiteri.

In cheste situazion, la gnove concession e varà la stesse scjadence di chês fate prime e no varà nissun aument di presit.

A caric di chel che al domande di gambiâ di puest il cadavar o i rescj di un muart, a restin lis spesis: par comedâ lis colomberis prime che a vegnin tornadis al Comun, par vierzi e sierâ lis colomberis, par gjavâ fûr e spostâ il cadavar o i rescj, e ancje chês di caratar contratuâl e chês leadis.

Art. XXI

Concession provisorie di colomberis

- 1) La concession provisorie e pues vê al massim une durade di dôî agns. A la scjadence dai tiermins la colombero e à di jessi dade indaûr al Comun o dut cês si à di domandâle in concession par cincuante agns;
- 2) Il concessionari, partint dal dì de concession, al è obligât a tignî a ments che il Comun al à la plene capacitât, passâts i dôî agns da la sepulture provisorie, di gjavâ, cemût che a crôt miôr, il cadavar, baste dome che no sedi in pîts la stipule di un contrat di concession par la durade di cincuante agns. Tal cês che il Comun al vedi di gjavâ fûr il muart de colombero provisorie al è tignût a visâ daurman i parincj simpri che si rivi a cjatâju. Cualchi volte, in situazions straordenaris, il Sindic al pues lassâ in concession la colombero par altris dôî agns, prime però al à di sigurâsi che al sedi stât fat il paiament;
- 3) Par podê vê une colombero provisorie indulà meti dentri un muart si scugne paiâ al Comun, denant trat, dut il quid stabilît. Cuant che il muart al ven gjavât fûr de colombero dentri dai 6 mêis dal dì de sô sepulture, il concessionari al torne a vê indaûr mieçs dai bêçs paiâts;
- 4) Il presit da la concession al rivuarde lis spesis pal materiâl e pe metude sù de lastre (che e covente par sierâ la colombero) e lis spesis par tornâ a vierzi la colombero;
- 5) Lis colomberis a vegnin dadis in forme provisorie dome par meti i cuarps da la int muarte di pôc e che a vignaran metûts in un altri lûc;
- 6) Par il timp che e reste in vore la concession provisorie no si pues scrivi ni incidi nuie sore la lastre di marmul e nancje meti alc come ogjet di bielece. Chestis normis a colin se il concessionari, al moment da la domande di concession, a si impegne a lassâ un grum di bêçs, fissât di volte in volte da la Zonte Comunâl, come dipuesit;
- 7) Al è improibît, fate ecezion par chel che al è proviodût tal articul 20 come 1 di chest regolament, di spostâ un muart di une colombero provisorie intune altre.

Art. XXII

Concessions di lûcs risiervâts a personis singulis

La concession e dure cincuante agns e a la scjadence si pues rinovâ. La grandece di chescj lûcs e à di jessi: 0,80 metris di largjece par 2,20 metris di lungjece, e cun di plui tra un puest e chel altri e à di jessi une distance di 1 metri.

Chescj spazis risiervâts a vegnin dâts in maniere progressive cence lassâ cualchi lûc tal mieç vueit. Nol è pussibil dâ un puest risiervât di un cuadri cence che a sedin finîts duçj chei dal cuadri che al vignive prime.

Art. XXIII

La persone che e vûl vê un lûc risiervât al pues domandâ a cualchi imprese private di fâ sù la nicje baste che a vegnin mantignudis dutis lis normis stabilidis in suaze di sielte dai materiâi e di grandece dal lûc.

Ancje par chel che al rivuarde i lûcs risiervâts l'Ufici che si ocupe di concessions dentri tai Cimitieris dal Comun al à il dovê di tignî simpri azornât il registri, ven a stâi, inzornâ la date de concession, i dâts personâi da la persone muarte sedi che e vegni gjavade sedi che e vegni metude dentri te tombe, e il puest li che e vignarà metude jù, come scrit ancje tal articul 17 di chest regolament.

Art. XXIV

Al è pussibil poiâ jù plui muarts intune stesse aree risiervade lant daûr a ce che al dîs l'articul 76 dal D.P.R 803/75. Par chestis concessions si à di paiâ il presint metût inte tabelle; se, invezit, si stâ fevelant di rescj gjavâts fûr di une altre tombe alore si à di paiâ la tasse che e rivuarde la sovraposizion di muarts.

Art. XV

Cemût tornâ indaûr une zone risiervade, cemût vê i bêçs indaûr o cemût gambiâ un puest

La zone risiervade che si fevele tal articul 22 si pues ancje tornâ indaûr al Comun. Par vê indaûr i bêçs o dome par gambiâ un lûc risiervât cuntun altri se si vûl meti dongje int de stesse famee o par tignî in bande un lûc par cualsisei da la famee dal concessionari a son validis lis normis stabilidis tai articui 19 e 20 di chest regolament.

Art. XXVI

Tant che câs speciâl e fin cuant che no son stâts fats sù avonde colomberis, si puedin tignî i rescj dai muarts par formis di dîs agns in dîs agns, ancje se lant daûr a la rotazion ordinarie, a varessin di jessi metûts intal ossari comun che si cjate dentri tal Cimiteri. Par cheste concession si à di paiâ un quid metût in tabelle.

Lis spesis par tornâ a meti a puest la lastre di marmul o la colombero daspò di vê fat i lavôrs di rotazion dal quadri, a son a caric di chel che al fâs la domande. A ogni mût al è improibît meti i muarts un parsore chel altri dentri tal cjamp in comun.

Art. XXVII

Ultimis disposizioni

Lis domandis di concessions o di lavôrs speciâi, lis domandis par spostâ i cuarps dai muarts o dut ce che nol è metût in chest regolament, a vignaran cjapadis in esam da la Zonte Comunâl che, daspò di vê sintût l'Assessôr, e pues acetâlis di plante fûr o dome in part.

Art. XXVIII

Il regolament di Polizie mortuarie che al è stât fat bon cun R.D. dai 21 di Dicembar dal 1942 numar 1880 al è stât abrogât.

A son stadis abrogadis ancje dutis lis disposizioni contrariis, ven a stâi, chês che a son incompatibilis cun lis disposizioni di chest regolament.

A restin buinis lis concessions fatis lant daûr lis normis stabilidis prime di chest regolament.